

## Amor ta Skirbí “T-E-M-P-U”

Kuantu bo ta stima bo yu? Sin duda, algun mayor lo respondé ku nan asta ta despuesto pa duna nan bida pa nan famia. Ma mayoria yu no ta deseoso pa nan mayornan muri pa nan. E yunan ta deseá pa nan mayornan **biba** pa nan

Skritura ta papia di “...restorá kurason di e tatanan pa nan yunan, i kurason di e yunan pa nan tatanan...” (Malakias 4:6). Mayornan ta deseoso pa kurason di nan yunan ta restorá pa ku nan. Ma esei lo no sosodé te ora ku kurason di mayornan ta restorá pa ku nan yunan. Awendia kurason di hopi mayor ta leu di nan yunan. Sin duda nos tin mester di e restorashon aki.

Kurason di hopi mayor ta bai tras di sèn, kas, outo, amistad, deporte, televishon, èts. Tantu tata komo mama ta tan okupá trahando pa nan famia por gosa un bida mas komfortabel ku nan no tin tempu pa nan yunan. Pa sasia nan konsenshi, nan ta regalá nan yunan kos material. **Ma bo yu no ke bo kosnan; e ta deseá abo mes.** Un mucha ta skirbi e palabra stimashon di e siguiente manera: T-E-M-P-U.

Hopi mayor ta tan okupá ku nan no tin tempu pa nan yunan. Otro mayor por—ma no ta despuesto pa—dediká tempu pa nan yu. Un mayor asina di bèrdat ta stima su yu?

Por ehèmpel, kiko ta bo aktitut pa ku alargamentu di e orario di skol? Bastante mayor ta kontentu pa skol kaba 3’or di atardi ...i lo ta mas kontentu p’è kaba 5’or. Nan por deshasí di nan yunan mainta tempran, traha i hasi nan kosnan trankil, anto topa e yunan bèk te lat atardi mientras otro hende ta sòru pa nan.

Ma ta yu di ken e mucha ta? E ta yu di yùfrou òf mener? Di kabes di skol? E ta yu di gobièrnu? Klaramente ta bo yu! E dosente ta kumpli ku responsabilidad di mayornan ora nan ta eduká bo yunan. Mayornan ta responsabel pa nan edukashon.

Nos mester enkurashá “...restorá kurason di e tatanan pa nan yunan...” Nos mester enkurashá mayornan pa dediká tempu pa nan yunan! Ma alargamentu ta hasi nèt lo kontrario.

Tin mama ku a skohe konsientemente pa no buska trabou pafó di kas nètamente pa e por dediká mas tempu pa su yunan. E mama ke prepará su yunan pa ta hòmber i muhénan responsabel den nos komunidat. E ke pa su yunan kapta su normanan i su balornan. E ta asina deseoso pa hasi esaki ku e ta sakrifiká su salario pa e por dediká mas tempu ku su yunan. **Esei sigur ta algu di aploudí!** Ma segun e sistema di alargamentu, ta kastigá e mayor ei ku ta duna un bon ehèmpel. E mama lo ta prohibí di invertí mas tempu pa su yunan!

Ta nesario pa alargamentu ta **obligatorio** pa tur mucha? Sin duda, algun mayor ke pa nan yu keda skol...te ora di drumi mes ta bon ku nan. Ma ta hustu pa kastigá e mayor responsabel ku ta dediká tempu pa su yunan, pasobra algun mayor no por—òf no ta despuesto—pa kansa kurpa ku nan?

Awendia, hende ta asina druk bezig, ku poko mayor lo haña tempu pa dediká pa su yunan. **Bo tin ku traha tempu.** Ma pa traha tempu por ta kostoso. E por nifiká ku e mama ta keda sin traha òf buska trabou di mitar dia so. E por nifiká ku bo ta gosa ménos fasilidat. E por nifiká ku bo ta sali ménos ku bo amigunan òf pèrdè bo programa favorito na televishon. E por nifiká ku bo ta bisa “nò” pa un promoshon na trabou òf un sita importante.

Ora dia di bo morto ta yega, dos kos so lo ta importante. Bo lo no ta interesá kuantu sèn bo a gana, kon popular bo tabata, kiko bo a logra, ki promoshon bo a haña, èts. Loke lo ta importante ta: 1) Bo relashon ku Dios...si bo lo haña entrada serka Dios pasobra bo a konfia Kristo Hesus so pa skapábo for di fièrnu. 2) Bo relashon pa ku bo famia...bo kasá i bo yunan. Si bo no ta skirbi amor ku e lèternan T-E-M-P-U awor, talbes nan lo no tin tempu pa bo e dia ei...